



Կարգապահական գործ թիվ ԿԳ-18094

Հայաստանի Հանրապետության փաստաբանների պալատի խորհրդի
2018 թվականի հուլիսի 7-ի թիվ 175-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/132-Ա

**ՓԱՍՏԱԲԱՆ ԻՐԻՆԱ ՄԱՆՈՒԿՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ
(ՎԵՐԱՊԱՏՐԱՍՏՄԱՆ ԴԱՍԸՆԹԱՅՆԵՐԻ ԳՈՐԾՈՎ)**

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Տիգրան Խուրշուդյանի, Խորհրդի անդամներ՝ Կարապետ Աղաջանյանի, Նելլի Հարությունյանի, Արայիկ Ղազարյանի, Կարեն Սարգսյանի և Կարեն Մեժլումյանի կազմով,
քարտուղարությամբ Նոննա Համբարձումյանի,
քննության առնելով փաստաբան Իրինա Մանուկյանին (արտոնագիր՝ թիվ 392) կարգապահական պատասխանատվության ենթարկելու վերաբերյալ հարցը՝

Պ Ա Ր Ձ Ե Ց

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (**այսուհետ նաև՝ Դպրոց**) կողմից 16.03.2018թ. տրված տեղեկանքի համաձայն՝ փաստաբան Իրինա Մանուկյանը 04.06.2017 թվականից առ 15.03.2018 թվականը չի մասնակցել ՀՀ փաստաբանների պալատի խորհրդի թիվ ԿԳ-16081 կարգապահական գործով 04.04.2017թ. որոշմամբ սահմանված լրացուցիչ վերապատրաստման դասընթացների:

Խորհրդի թիվ ԿԳ-16081 կարգապահական գործով 04.04.2017թ. որոշմամբ (**այսուհետ՝ Խորհրդի որոշում**) փաստաբան Իրինա Մանուկյանը ճանաչվել է մեղավոր Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ նաև՝ Կանոնագիրք**) 2.7.2 ենթակետի պահանջների խախտման համար:

Խորհրդի որոշմամբ փաստաբան Իրինա Մանուկյանի (արտոնագիր 392) նկատմամբ կիրառվել է կարգապահական տույժ՝ խիստ նկատողություն և լրացուցիչ կարգապահական տույժ՝ իր հաշվին 6 ամսվա ընթացքում լրացուցիչ վերապատրաստման դասընթացներին մասնակցություն՝ «Դեոնթոլոգիա» թեմայով 6 (վեց) ակադեմիական ժամ ժամաքանակով: Նշված որոշումը օրինական ուժի մեջ է մտել 04.06.2017թ.:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի առաջին տեղակալի 20.03.2018թ. թիվ 164-Ա/ԿԳ-18094 որոշմամբ կարգապահական վարույթ է հարուցվել փաստաբան Իրինա Մանուկյանի նկատմամբ՝ «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ հոդվածի 1-ին մասի 4.1 կետի, 39.9 հոդվածի 3-րդ մասի և Կանոնագրքի 2.8.2 ենթակետի խախտման հատկանիշներով:

22.03.2018թ. կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2018 թվականի հուլիսի 7-ին, ժամը՝ 13:16-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

3. Պատասխանողի համառոտ բացատրությունը.

Փաստաբան Իրինա Մանուկյանը բացատրություն չի ներկայացրել: Փաստաբան Իրինա Մանուկյանը թեև պատշաճ ծանուցվել է կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) ՀՀ փաստաբանների պալատի խորհրդի թիվ ԿԳ-16081 կարգապահական գործով 04.04.2017թ. թիվ ԿԳ/35-Ա որոշմամբ փաստաբան Իրինա Մանուկյանը ճանաչվել է մեղավոր Կանոնագրքի 2.7.2 ենթակետի պահանջների խախտման համար և նրա նկատմամբ կիրառվել է կարգապահական տույժ՝ խիստ նկատողություն և լրացուցիչ կարգապահական տույժ՝ իր հաշվին 6 ամսվա ընթացքում լրացուցիչ վերապատրաստման դասընթացներին մասնակցություն՝ «Դեոնթոլոգիա» թեմայով 6 (վեց) ակադեմիական ժամ ժամաքանակով:

Նշված փաստը հաստատվում է Խորհրդի թիվ ԿԳ/35-Ա որոշմամբ:

2) Փաստաբան Իրինա Մանուկյանը Խորհրդի որոշումը ստացել է 03.05.2017թվականին:

Նշված փաստը հաստատվում է հետադարձ ծանուցագրով:

3) 2017թ. երկրորդ կիսամյակի (հուլիս-դեկտեմբեր (ներառյալ)) ընթացքում ՀՀ փաստաբանների պալատի և ՀՀ փաստաբանական դպրոցի կողմից կազմակերպվել են ընդհանուր 111 (հարյուր տասնմեկ) դասընթաց, որոնցից Դպրոցի և Պալատի կողմից կազմակերպվել է 11 (տասնմեկ) վերապատրաստման դասընթաց՝ Դեոնթոլոգիա թեմայով (8-ը՝ Պալատի, իսկ 3-ը՝ Դպրոցի կողմից):

2018թ. հունվար-փետրվար ամիսներին ՀՀ փաստաբանների պալատի և ՀՀ փաստաբանական դպրոցի կողմից կազմակերպվել են ընդհանուր 17 (տասնյոթ) դասընթաց, որոնցից Դպրոցի և Պալատի կողմից կազմակերպվել է 2 (երկու) վերապատրաստման դասընթաց՝ Դեոնթոլոգիա թեմայով (1-ը՝ Պալատի, իսկ 1-ը՝ Դպրոցի կողմից):

Նշված փաստը հաստատվում է Պալատի աշխատակազմի ղեկավարի 06.07.2018թ. տեղեկանքով, ինչպես նաև Պալատի աշխատակազմի ղեկավարի 06.07.2018 թվականի տեղեկանքով:

4) Փաստաբան Իրինա Մանուկյանը 14.06.2017 թվականից առ 15.03.2018

թվականը չի մասնակցել ՀՀ փաստաբանների պալատի խորհրդի թիվ ԿԳ-16081 կարգապահական գործով 04.04.2017թ. որոշմամբ սահմանված լրացուցիչ վերապատրաստման դասընթացների:

Նշված փաստը հաստատվում է Դպրոցի 16.03.2018թ. տեղեկանքով:

5. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից 06.07.2018թ. տրամադրված տեղեկանքի համաձայն՝ Իրինա Մանուկյանը փաստաբան է հանդիսանում 12.06.2000 թվականից:

2015-2018թթ. ընկած ժամանակահատվածում Իրինա Մանուկյանի նկատմամբ 4 անգամ հարուցվել է կարգապահական վարույթ, որոնցից մեկը կարճվել է:

Պալատի խորհրդի 16.10.2015թ. թիվ ԿԳ/154-Ա որոշմամբ անդամավճար վճարելու պարտականությունը չկատարելու համար Իրինա Մանուկյանը ենթարկվել է կարգապահական պատասխանատվության և նրա նկատմամբ կիրառվել է կարգապահական տույժ՝ նկատողություն (**տույժը մարված է**):

Պալատի խորհրդի 06.10.2016թ. թիվ ԿԳ/117-Ա որոշմամբ անդամավճար վճարելու պարտականությունը չկատարելու համար Իրինա Մանուկյանը ենթարկվել է կարգապահական պատասխանատվության և նրա նկատմամբ կիրառվել է կարգապահական տույժ՝ նկատողություն (**տույժը մարված է**):

Պալատի խորհրդի 04.04.2017թ. թիվ ԿԳ/35-Ա որոշմամբ Կանոնագրքի 2.7.2 ենթակետի պահանջների խախտման համար Իրինա Մանուկյանը ենթարկվել է կարգապահական պատասխանատվության և նրա նկատմամբ կիրառվել է կարգապահական տույժ՝ խիստ նկատողություն և լրացուցիչ կարգապահական տույժ՝ իր հաշվին 6 ամսվա ընթացքում լրացուցիչ վերապատրաստման դասընթացներին մասնակցություն՝ «Դեոնթոլոգիա» թեմայով 6 (վեց) ակադեմիական ժամ ժամաքանակով (**տույժը մարված չէ**):

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Իրինա Մանուկյանին պետք է ենթարկել կարգապահական պատասխանատվության՝ հետևյալ պատճառաբանությամբ.

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի, Հայաստանի Հանրապետության փաստաբանների պալատի կանոնադրության, Կանոնագրքի և Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված Փաստաբանների վերապատրաստման կարգի (այսուհետ՝ Վերապատրաստման կարգ) դրույթներով:

Օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է՝ ... սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:

Օրենքի 39.9-րդ հոդվածի 3-րդ մասի համաձայն՝ Լրացուցիչ վերապատրաստման դասընթացներին մասնակցելու ժամաքանակը որոշում է փաստաբանների պալատի խորհուրդը: Լրացուցիչ վերապատրաստման

դասընթացներին մասնակցելը կարող է կիրառվել նաև որպես լրացուցիչ տույժի միջոց սույն հոդվածի 1-ին մասի 1-ին, 2-րդ և 4-րդ կետերով նախատեսված տույժերից մեկի կիրառման հետ մեկտեղ:

Կանոնագրքի 2.8.2 ենթակետը սահմանում է, որ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Օրենքը վերապատրաստման դասընթացի պարտադիր մասնակցության երկու տեսակ է սահմանել՝ հիմնական և լրացուցիչ: Վերապատրաստման դասընթացների մասնակցության ժամաքանակը և կարգը սահմանում է Պալատի խորհուրդը:

Վերապատրաստման կարգի 17-րդ և 18-րդ կետերի համաձայն՝

17. ՀՀ փաստաբանների պալատի խորհրդի կողմից լրացուցիչ վերապատրաստման ժամանակաշրջան սահմանված չլինելու դեպքում, փաստաբանը լրացուցիչ վերապատրաստման դասընթաց պարտավոր է անցնել խորհրդի որոշումն ուժի մեջ մտնելու օրվանից 6 (վեց) ամսվա ընթացքում:

18. Փաստաբանն իր հաշվին վերապատրաստման դասընթացներին մասնակցելու դեպքում պարտավոր է առնվազն երեք օր առաջ առձեռն կամ փոստային ծառայության միջոցով գրավոր տեղեկացնել ՀՀ փաստաբանների պալատին, նշելով՝

ա) խորհրդի որոշման ամսաթիվը և համարը, որի հիման վրա սահմանվել է լրացուցիչ վերապատրաստում,

բ) արտոնագրի համարը,

գ) ՀՀ փաստաբանների պալատի, Փաստաբանական դպրոցի, ՀՀ փաստաբանների պալատի խորհրդի կողմից հավատարմագրված կամ ՀՀ փաստաբանների պալատի կողմից ընդունելի վերապատրաստում իրականացնող այլ կազմակերպության անվանումը,

(ենթակետը փոփոխվել է ՀՀ ՓՊ խորհրդի 21.12.2016թ. թիվ 26/5-Լ որոշմամբ)

դ) դասընթացավարի անունը, ազգանունը,

ե) դասընթացի թեման և

զ) դասընթացի անցկացման օրը, ժամը և վայրը:

Դիմումը պետք է ստորագրված լինի փաստաբանի կողմից, դիմումին պետք է կցված լինի վերապատրաստում իրականացնող կազմակերպությանը վճարում կատարելու փաստը հաստատող անդորրագրի պատճենը (կամ այդ կազմակերպության գրավոր հավաստումը, որ տեղեկացված է փաստաբանի կողմից իր հաշվին լրացուցիչ վերապատրաստման դասընթացներին մասնակցելու անհրաժեշտության մասին): Սույն կետում նշված կարգի խախտմամբ իրականացված վերապատրաստումը ՀՀ փաստաբանների պալատը չի հաշվարկելու: Սույն կետում նշված կանոնները կիրառվում են նաև լրացուցիչ վերապատրաստման դասընթացներին մասնակցելու ձևով կարգապահական տույժի ենթարկված փաստաբանների նկատմամբ:

Վերը նշված կանոնների վերլուծությունից հետևում է, որ փաստաբանը պարտավոր է անցնել խորհրդի կողմից սահմանված կարգով և ժամաքանակով վերապատրաստման դասընթացներ: Սահմանված ժամկետում վերապատրաստման դասընթացներին չմասնակցելու համար փաստաբանն ենթակա է պատասխանատվության: Միաժամանակ սահմանված է, որ փաստաբանը պարտավոր է մասնակցել խորհրդի կողմից սահմանված լրացուցիչ վերապատրաստման դասընթացներին՝ խորհրդի կողմից սահմանված

ժամանակահատվածում, ինչպես նաև կատարել Խորհրդի՝ իրենց իրավասության սահմաններում ընդունված իրավական ակտերի պահանջները:

Փաստաբան Իրինա Մանուկյանի նկատմամբ սույն կարգապահական վարույթը հարուցվել է այն հիմքով, որ վերջինս, Խորհրդի որոշումն ուժի մեջ մտնելու օրվանից վեց ամսվա ընթացքում չի մասնակցել, իր նկատմամբ որպես լրացուցիչ տույժ կիրառված՝ լրացուցիչ վերապատրաստման դասընթացներին: Գործում առկա ապացույցների վերլուծությունից երևում է, որ խորհրդի 04.04.2017 թվականի թիվ ԿԳ/35-Ա որոշումը Իրինա Մանուկյանի մասով ուժի մեջ է մտել **2017 թվականի հունիսի 04-ից**: Հետևաբար, Իրինա Մանուկյանը պարտավոր էր խորհրդի որոշումն ուժի մեջ մտնելու հաջորդ օրվանից՝ 05.06.2017թ. մինչև 05.12.2017թ-ը (վեց ամսյա ժամկետում) մասնակցել վերապատրաստման դասընթացներին՝ իր հաշվին:

Ինչպես արդեն նշվել է, 2017թ. երկրորդ կիսամյակի (հուլիս-դեկտեմբեր (ներառյալ)) ընթացքում ՀՀ փաստաբանների պալատի և ՀՀ փաստաբանական դպրոցի կողմից կազմակերպվել են ընդհանուր 111 (հարյուր տասնմեկ) դասընթաց, որոնցից Դպրոցի և Պալատի կողմից կազմակերպվել է 11 (տասնմեկ) վերապատրաստման դասընթաց՝ Դեռնթոլոգիա թեմայով (8-ը՝ Պալատի, իսկ 3-ը՝ Դպրոցի կողմից): Ընդ որում, թեմաները նախապես հաստատված և տեղադրված են եղել Պալատի կայքում, ինչպես նաև յուրաքանչյուր ամսվա դասացուցակները հաստատվել և տեղադրված են եղել Պալատի կայքում:

Փաստաբան Իրինա Մանուկյանն այս ժամանակահատվածում (ինչպես նաև՝ 2018 թվականի հունվար-փետրվար ամիսներին) չի դիմել Պալատին դեռնթոլոգիայի դասընթացի մասնակցության համար կամ չի ներկայացրել Պալատի կողմից հավատարմագրված որևէ այլ կազմակերպության կողմից կազմակերպված դասընթացին մասնակցելու վերաբերյալ ապացույց:

Խորհուրդն արձանագրում է, որ փաստաբան Իրինա Մանուկյանն օբյեկտիվորեն ունեցել է հնարավորություն հաշվետու ժամանակահատվածում անցնելու 6 (վեց) ակադեմիական ժամ ժամաքանակով վերապատրաստման դասընթացները, սակայն չի կատարել օրենքով նախատեսված պարտականությունը և խախտել է «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 39.9-րդ հոդվածի 3-րդ մասի և Կանոնագրքի 2.8.2 ենթակետի պահանջները:

Նման պայմաններում Պալատի խորհուրդը գտնում է, որ Իրինա Մանուկյանը ենթակա է կարգապահական պատասխանատվության:

Կարգապահական տույժի ընտրությունը.

Օրենքի 39.9-րդ հոդվածի 1-ին մասի համաձայն՝ փաստաբանի կարգապահական պատասխանատվության հարցը քննելուց հետո փաստաբանների պալատի խորհուրդը կարող է փաստաբանի նկատմամբ կիրառել կարգապահական տույժերի հետևյալ տեսակներից մեկը, բացառությամբ սույն հոդվածի 3-րդ մասով նախատեսված դեպքի՝

- 1) նկատողություն.
- 2) խիստ նկատողություն.
- 3) մասնակցել լրացուցիչ վերապատրաստման դասընթացների
- 4) տուգանք (...):

Նույն հոդվածի 4-րդ մասի համաձայն՝ տուգանքի չափը սահմանում է

փաստաբանների պալատի խորհուրդը, որը չի կարող գերազանցել նվազագույն աշխատավարձի երկուհարյուրապատիկը: Տուգանքը փաստաբանը վճարում է փաստաբանների պալատի բյուջե:

Օրենքի 39.9 հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի խորհուրդը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Պալատի Խորհուրդը, հաշվի առնելով Օրենքի 39.9 հոդվածի 2-րդ մասում նշված հանգամանքները (այդ թվում՝ առկա տույժերը), փաստաբանի անձը, այն հանգամանքը, որ փաստաբան Իրինա Մանուկյանը չի կատարել Խորհրդի որոշումը, գտնում է, որ Պատասխանողի նկատմամբ պետք է ընտրել «տուգանք» կարգապահական տույժի տեսակը՝ 50.000 (հիսուն հազար) ՀՀ դրամի չափով:

Ելնելով վերոգրյալից, Պալատի խորհուրդը՝ ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7-րդ հոդվածի 5-րդ մասի 1-ին կետի, 39.9-րդ հոդվածի 1-ին մասի 4-րդ կետի, 4-րդ մասի, ՀՀ փաստաբանների պալատի կանոնադրության 16.26-րդ կետի, Կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման» կարգի 30-րդ հոդվածի 5-րդ մասի 1-ին կետի պահանջներով, ինչպես նաև Վերապատրաստման կարգի պահանջներով՝

Ո Ր Ո Շ Ե Ց՝

1. Փաստաբան Իրինա Մանուկյանին (արտոնագիր՝ թիվ 392) ճանաչել մեղավոր «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 39.9-րդ հոդվածի 3-րդ մասի և Կանոնագրքի 2.8.2 ենթակետի խախտման հարկանիշներով:

2. Փաստաբան Իրինա Մանուկյանի (արտոնագիր՝ թիվ 392) նկատմամբ կիրառել կարգապահական տույժ՝ տուգանք 50.000 (հիսուն հազար) ՀՀ դրամի չափով:

3. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Իրինա Մանուկյանին:

Ծանոթություն. Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

ՀՀ փաստաբանների պալատի խորհրդի
կարգապահական գործով
նիստը նախագահող՝

Տիգրան Խուրշուդյան

**07 հուլիս 2018թ.
թիվ ԿԳ/132-Ա
ք. Երևան**